

GRADUAN BERMUTU PEMANGKIN KEBOLEHPASARAN INDUSTRI

Oleh: **Suhaila binti Sharil & Siti Aishah binti Sokhibul Fadil**
Akademi Pengajian Islam Kontemporari. UiTM Cawangan Negeri Sembilan

Akademi Pengajian Islam Kontemporari (ACIS), UiTM Cawangan Negeri Sembilan Kampus Kuala Pilah mula menawarkan Program Diploma Pengurusan Halal pada Julai 2018 dan sehingga kini program ini telah menjadi tumpuan masyarakat serta pilihan dalam kalangan pelajar lepasan SPM untuk meneruskan pengajian di peringkat diploma UiTM dalam bidang halal. Hal ini dibuktikan sehingga Mac 2021, jumlah semasa pelajar yang masih aktif dalam pengajian telah mencecah seramai 383 orang pelajar. Peningkatan jumlah pelajar ini sudah pasti memerlukan perhatian dan perancangan rapi daripada pihak ACIS untuk merencana hala tuju pelajar sesuai dengan industri halal semasa.

Peranan dan tanggungjawab ini telah digalas bersama-sama oleh pensyarah-pensyarah yang bertungkus lumus menyampaikan ilmu kepada pelajar sehingga berjaya melahirkan seramai 116 orang pelajar yang telah bergraduasi dalam tempoh pengajian pada 12 Mac 2021 yang lalu. Impaknya sebahagian pelajar telah menyambung pengajian di peringkat ijazah dalam bidang industri halal dan ada sebahagian pula mengambil keputusan untuk terus bekerja bagi menimba pengalaman lebih awal dalam industri halal. Menyedari potensi pelajar yang semakin berkembang ini, maka penting bagi ACIS meneruskan kejayaan untuk memastikan program ini mampu melahirkan graduan yang bermutu dan memenuhi kebolehpasaran dalam industri halal.

Hakikat ini turut dirasai oleh Ustazah Siti Aishah Binti Sokhibul Fadil yang merupakan Koordinator Diploma Pengurusan Halal, bahawa melahirkan graduan bermutu menjadi pemangkin kebolehpasaran industri bukanlah satu yang mudah, tetapi memerlukan satu usaha untuk menggilap bakat-bakat sedia ada bagi melahirkan potensi besar daripada konteks kepimpinan dalam industri. Oleh yang demikian, bakat perlulah digilap dengan ilmu, pengajaran dan pembelajaran serta pengalaman berterusan dan holistik supaya ianya selari dengan syariat Islam.

Maka, bertitik tolak daripada idea tersebut, beliau telah menginspirasi sebuah Webinar Kebolehpasaran Pelajar Halal pada 25 Jun 2021 khusus kepada pelajar program Diploma Pengurusan Halal bermula jam 2.45 petang melalui saluran *youtube live*. Webinar anjuran Akademi Pengajian Islam Kontemporari (ACIS) ini turut mendapat kerjasama daripada Persatuan Diploma Pelajar Halal (PDPH) dan pihak *Industry Community and Alumni Network (ICAN)* sebagai penggerak pelaksanaan webinar ini. Tujuan webinar ini bukan sahaja memberi pengalaman kepada pelajar malah mendedahkan pelajar ke alam kerjaya supaya mereka lebih bersedia dan berusaha untuk menjadi graduan yang

gemilang dan terbilang di mata masyarakat. Selain itu, objektif bagi program ini adalah untuk mewujudkan ruang perkongsian pengalaman alumni ACIS bersama pelajar tahun akhir dengan mengetengahkan cabaran di alam pekerjaan bagi memberi dorongan kepada pelajar untuk menceburi bidang perniagaan halal yang sedang pesat membangun pada masa kini. Di samping membina jaringan kerjasama yang kukuh antara ACIS, pelajar alumni dan pihak industri melalui perkongsian maklumat dan keperluan semasa bagi memenuhi prospek kerjaya halal pada masa akan datang.

Justeru bagi mencapai objektif webinar tersebut, penceramah undangan yang berpengalaman luas dalam industri halal telah dijemput mengadakan perkongsian bersama pelajar iaitu Encik Mohamad Khairul Akmal Bin Shamir selaku *Eksekutif Halal Training Development* dan merupakan alumni ACIS serta Encik Mohd Jabal bin Abdul Rahim merangkap *Head of Department Halal Center of Excellence*. Kedua-dua panel jemputan ini telah memberikan penjelasan berkenaan prospek kerjaya Halal dan perkongsian tips untuk *Graduate on Time* bagi pelajar-pelajar tahun akhir dan pelajar-pelajar yang sedang mengikuti pengajian Diploma Pengurusan Halal. Apa yang menarik, webinar ini telah mendapat sambutan yang sangat menggalakkan dengan kehadiran peserta seramai 184 orang peserta terdiri daripada pelajar, pensyarah dan orang awam.

Hasil daripada maklum balas yang diterima, majoriti peserta bersetuju dengan penganjuran webinar dari aspek objektif program yang mendatangkan pelbagai ilmu dalam prospek kerjaya pelajar bidang halal, kandungan program yang sangat teratur dan mudah difahami serta masa perjalanan program yang sangat sesuai. Selain itu, majoriti peserta juga sangat bersetuju bahawa program ini dapat meningkatkan kemahiran serta pengetahuan sebagai pelajar dalam bidang berkaitan di samping dapat mengaplikasikan ilmu yang dipelajari dan memberikan impak positif dalam diri mereka serta menyarankan agar program ini dapat diteruskan lagi pada masa hadapan. Selaras dengan keberhasilan ini, maka dapat disimpulkan bahawa tuntutan prospek bidang kerjaya halal adalah sangat tinggi untuk dikuasai dan berusaha menggarap peluang sebaiknya oleh pelajar bidang halal dan juga masyarakat luar. Namun demikian, masyarakat juga perlu berganding bahu untuk meluaskan lagi prospek bidang halal supaya tidak hanya berada di pasaran Malaysia semata-mata malah menjangkau prospek dunia dan perkara ini akan meningkatkan kemajuan Muslim di persada antarabangsa untuk menceburi bidang perniagaan dan dalam masa yang sama dapat membantu masyarakat lain dari sudut pengurusan ekonomi yang menjadi penyumbang kepada zakat terbesar.

Akhir kata, pihak ACIS mengucapkan ribuan terima kasih kepada semua yang terlibat dalam penganjuran webinar kebolehpasaran pelajar halal terutamanya kepada Bahagian Hal Ehwal Akademik (BHEA) yang memberi kelulusan dan peruntukan bajet. Tidak lupa juga kepada Timbalan Rektor HEA, Dr Noorlis Binti Ahmad yang sudi menjadi perasmis program, pihak ICAN yang tidak putus asa menyumbang idea dan buah fikiran serta semua ahli jawatankuasa yang telah bertungkus lumus memastikan program webinar ini berjalan dengan baik.